



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o pristupanju Projektu osnivanja naučno-istraživačke infrastrukture "Tech4Green"
(Prijedlog)

Predlagač: Predsjedavajući Gradskog vijeća
Jasmin Ademović

Obrađivač: Stručna službe za poslove Gradskog vijeća

Sarajevo, juni 2023. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b), l i k, te člana 76. i člana 91. Statuta Grada Sarajeva („Službene novine Kantona Sarajevo“, broj 7/23), Gradsko vijeće Grada Sarajeva, na ____ sjednici održanoj dana __. __. 2023. godine, donijelo je:

(Prijedlog)

Odluka
o pristupanju Projektu osnivanja naučno-istraživačke infrastrukture "Tech4Green"

Član 1.

(Predmet Odluke)

Ovom Odlukom uređuje se način pristupanja Grada Sarajeva Projektu osnivanja naučno-istraživačke infrastrukture "Tech4Green" (u daljem tekstu: „Tech4Green“), način upravljanja, uzajamni odnosi uključenih strana i finansiranje obaveza Grada Sarajeva u cilju realizacije Projekta.

Član 2.

(Osnovna načela)

- (1) *Liderstvo* - Gradsko vijeće Grada Sarajeva ima lidersku poziciju u provedbi Projekta iz člana 1. ove odluke i bit će nosilac svih aktivnosti na njegovoj realizaciji u skladu sa najvišim principima transparentnosti, zaštite i promocije javnog interesa, očuvanja okoliša i modernizacije bazirane na dostignućima naučnih istraživanja, savremenim informaciono-komunikacijskim tehnologijama i digitalnim rješenjima s ciljem podsticanja razvoja inovacija, istraživanja i popularizacije nauke.
- (2) *Učešće* - Gradsko vijeće Grada Sarajeva u skladu sa svojom liderskom pozicijom iz stava 1. ovog člana obavezuje se ustupiti na korištenje i upravljanje imovinu u svom vlasništvu, koja se sastoji od objekta „Vidikovac“ na Trebeviću sa svom pripadajućom infrastrukturom neophodnom za potpunu implementaciji Projekta iz člana 1. ove Odluke, nakon završetka izgradnje objekta „Vidikovac“, a koji će na ovaj način dobiti namjenu primjerenu lokaciji na kojoj je izgrađen, u skladu sa nadležnostima Grada Sarajeva i potrebama šire društvene zajednice.
- (3) *Strateška vizija* - Pristupanje Projektu iz člana 1. ove Odluke je u direktnoj funkciji dostizanja strateškog cilja Grada Sarajeva – "*Grad budućnosti i riznica prošlosti-Pametni grad*", utvrđenih važećom Strategijom razvoja Grada Sarajeva, kao i osiguravanja uslova za daljnji razvoj nauke, tehnologije i privrede na području Grada Sarajeva ali i cijele Bosne i Hercegovine. Na taj način, Grad Sarajeva dodatno potvrđuje svoj status kao glavni grad države Bosne i Hercegovine.
- (4) *Partnerstvo* - Gradsko vijeće Grada Sarajeva će tokom implementacije Projekta iz člana 1. ove Odluke ostvarivati kontinuiranu saradnju sa svim subjektima koji mogu doprinijeti ciljevima Projekta, a naročito sa Kantonom Sarajevo, Univerzitetom u Sarajevu, Naučno-istraživačkim institutom Verlab za biomedicinski inženjering, medicinske uređaje i vještačku inteligenciju, te Delegacijom EU u BiH koja će osigurati podršku Projektu kroz odgovarajuće finansijske instrumente EU.

Član 3. (Ciljevi Projekta)

- (1) Osnovni cilj Projekta iz člana 1. ove Odluke je pružanje podrške u domenu razvijanja naučnih i istraživačkih djelatnosti, koje se odnose na uspostavu „Pametnog grada“ kao ključne strateške vizije Grada Sarajeva, kao i uspostava naučno istraživačke infrastrukture neophodne za ubrzani razvoj naučne i poslovne zajednice Grada Sarajevo, Kantona Sarajevo, Federacije Bosne i Hercegovine i države Bosne i Hercegovine, kao i uspostavljanje neophodnih tehnoloških preduslova za digitalnu transformaciju javnih institucija i službi u BiH, kao i digitalne prilagodbe poslovnog sektora.
- (2) Osnovna djelatnost Tech4Green je naučno-istraživački rad te prikupljanje i obrada podataka, uključujući velike količine podataka potrebnih za učinkovito upravljanje i donošenje odluka zasnovanih na objektivnim pokazateljima za potrebe javnih institucija, naročito kada se radi o dostizanju strateških i operativnih ciljeva u svim sferama od interesa za Grad Sarajevo i drugih institucija, prvenstveno u Kantonu Sarajevo ali i Federaciji Bosne i Hercegovine, državi Bosni i Hercegovini i šire, formulisanih o okviru UN SDG, te EU strategija kao što su *Green Deal* i digitalna strategija *A Europe fit for digital Age*, i za potrebe svih drugih strana koje iskazuju interes za korištenje usluga ovakvog naučno-istraživačke infrastrukture, što uključuje i potencijalne korisnike iz drugih država.

Član 4. (Osnovne aktivnosti u okviru Projekta)

- (1) Primarna aktivnost Projekta se sastoji u stvaranju neophodnih uslova za uspostavu Tech4Green sa modernom naučno-istraživačkom i tehničkom infrastrukturom, koja uključuje računar visokih performansi i druge tehnološke alate neophodne za osiguravanje i podsticanje daljnjeg procesa digitalne transformacije, razvoja novih tehnologija i inovacija unutar akademskog i poslovnog sektora u Bosni i Hercegovini.
- (2) Nakon uspostave i početka rada Tech4Green, sve javne institucije, naučna i poslovna zajednica u BiH i drugi zainteresirani subjekti će dobiti pravo i mogućnost da, u skladu sa uvjetima koji će se naknadno propisati odlukama Gradskog vijeća Grada Sarajevo, koriste sve kapacitete Tech4Green u cilju razvoja i unaprjeđenja svog djelovanja i poslovanja, u skladu sa općeprihvaćenim standardima i ciljevima održivog razvoja.
- (3) Grad Sarajevo će u cilju ubrzanja vlastitog razvoja, u skladu sa definisanim strateškim ciljevima i kroz partnerski odnos sa Kantom Sarajevo, Univerzitetom u Sarajevu i Verlab institutom u Sarajevu, te drugim domaćim i međunarodnim subjektima u oblasti novih tehnologija i održivog razvoja, nastaviti daljne razvijanje Projekta.
- (4) Grad Sarajevo će za potrebe upravljanja formirati posebno pravno lice - Fondaciju „Tech4Green“, a nakon donošenja posebne Odluke o osnivanju Fondacije od strane Gradskog vijeća, koja će uključivati i usvajanje Statuta Fondacije, kojim će se utvrditi međusobna prava i obaveze učesnika u Projektu, uz lidersku poziciju Grada Sarajevo.

Član 5. (Obaveze uključenih strana)

- (1) Nalaže se Javnom preduzeću za upravljanje, zaštitu i održavanje objekata Grada Sarajeva i obavljanje komunalnih djelatnosti od javnog interesa Grada Sarajeva "SARAJEVO" društvo sa ograničenom odgovornošću (skraćeno: Javno preduzeće Sarajevo d.o.o.) da preduzme aktivnosti u cilju otklanjanja nedostataka izvedenih radova na poslovnom

objektu na mjestu porušenog hotela, te vanjskog uređenja na lokaciji „Vidikovac-Trebević“ utvrđenih u Privremenom izvještaju o izvršenom tehničkom pregledu izvedenih radova izgradnje Općine Stari Grad Sarajevo br. UP-I-05-19-2258/21-IH od decembar 2021. godine, a sve u cilju da bi Grad Sarajevo kao investitor predmetnog objekta mogao ishodovati odobrenja za upotrebu izvedenih radova.

- (2) Nalaže se gradonačelnici Grada Sarajevo sa nadležnim gradskim službama i Pravobranilaštvu Grada Sarajevo da Javnom preduzeću Sarajevo d.o.o. po zahtjevu istog, stave na raspolaganju svu relevantnu dokumentaciju i informacije u cilju postupanja po stavu 1. ovog člana.
- (3) Ostavlja se rok od dva (2) mjeseca za postupanje JP Sarajevo d.o.o. u skladu sa stavom 1. ovog člana.
- (4) JP Sarajevo d.o.o. je dužno po isteku roka iz tačke 3. ovog Zaključka informisati Gradsko vijeće Grada Sarajeva o poduzetim aktivnostima u pogledu stava 1. ovog člana, a kako bi se Gradsko vijeće moglo odrediti o daljim radnjama.

Član 6.

(Način finansiranja)

Grad Sarajevo će u budžetu Grada Sarajeva osigurati potrebna finansijska sredstva za početak implementacije Projekta iz člana 1. ove Odluke, uključujući i sredstva neophodna za finalizaciju projekta izgradnje objekta na Vidikovcu.

Član 7.

(Stupanje na snagu i početak primjene)

Ova odluka stupa na snagu sedam dana od dana objavljivanja u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Jasmin Ademović

Broj:

Datum:

OBRAZLOŽENJE

PRAVNI OSNOV

Pravni osnov za donošenje ove Odluke sadržan je u članu 31. stav (1) tačke b). l) i k. Statuta Grada Sarajeva („Službene novine Kantona Sarajevo“, broj 7/23) kojim je propisana nadležnost Gradskog vijeća Grada Sarajeva da donosi odluke, druge propise i opće akte i daje njihovo tumačenje, odnosno da osniva javna preduzeća i javne ustanove i druga pravna lica za obavljanje privrednih, društvenih, komunalnih i drugih djelatnosti od interesa za Grad Sarajevo, kao i da upravlja i raspolaze imovinom Grada Sarajevo, kao i članu 76. Statuta Grada Sarajevo, koji uređuje pitanja imovine i načine upravljanja imovinom Grada Sarajevo, te članu 91. Statuta Grada Sarajevo, koji uređuje saradnju Grada Sarajevo s kantonalnim, federalnim i vlastima Bosne i Hercegovine.

RAZLOZI ZA PREDLAGANJE ODLUKE

Aktuelna administracija Grada Sarajevo od početka svog rada posvećena je ubrzanju razvoja Grada Sarajevo kao glavnog grada Bosne i Hercegovine, sa vizijom jačanja pozicije Grada Sarajevo i kao centra novih tehnologija, inovacija, zaštite okoliša i postizanja što boljih uslova života svih njegovih građana.

S tim u vezi, administracija Grada Sarajevo od početka svog mandata nastoji u potpunosti iskoristiti sve potencijale Grada Sarajevo kako bi se ostvarili ovi ambiciozni ciljevi. Jedan od ključnih načina dostizanja navedenih ciljeva jeste i puno iskorištavanje postojećih resursa Grada Sarajevo i njihovo stavljanje u funkciju dostizanja navedenih ciljeva i ispunjenja vizije razvoja.

Treba naglasiti kako je jedan od najvećih problema sa kojim se administracija susrela, kada je u pitanju iskorištavanje i unaprjeđenje imovine sa kojom Grad Sarajevo raspolaze, jeste dovršetak i budući status objekta „Vidikovac“ na Trebeviću. Prema ranijim planovima, prethodne gradske administracije, taj objekt je zamišljen kao ugostiteljski objekt, koji bi Grad Sarajevo dao pod najam i ostvarivao određene prihode od plaćanja najma.

Ovakav koncept je, prema stajalištu aktuelne gradske administracije, u potpunosti pogrešan i promašen iz najmanje dva razloga. Prvi je da takva namjena objekta ne osigurava povrat uloženi sredstava Grada Sarajevo u bilo kakvom prihvatljivom roku, a drugi je što takva namjena objekta ne osigurava bilo kakvu dodatnu vrijednost za Grad Sarajevo i njegove građane i može značajno negativno utjecati na okoliš na području Trebevića.

Vođeni ovim načelima, administracija Grada Sarajevo u posljednjih godinu je vodila niz razgovora sa predstavnicima domaćih i međunarodnih partnera s ciljem kreiranja potpuno novog koncepta objekta „Vidikovac“ Trebević. Između ostalog, Grad Sarajevo je sa Naučno-istraživačkim institutom Verlab za biomedicinski inženjering, medicinske uređaje i vještačku inteligenciju potpisao 8. jula 2022. godine Sporazum o saradnji, kojim je definirano i zajedničko nastupanje prema domaćim i međunarodnim fondovima, koji bi se iskoristili za dodatno finansiranje naučno-istraživačkih projekata, digitalizaciju, razvoj novih tehnologija i inovacija.

Ovakvu novu, moderniziranu viziju nove administracije Grada Sarajevo su prepoznali i drugi nivoi vlasti u Bosni i Hercegovini, naučna zajednica i međunarodni subjekti, sa kojima su obavljene potrebne konsultacije u cilju iznalaženja modela zajedničkog djelovanja u uzajamnom interesu podsticaja razvoja. Upravo je Projekat osnivanja "Tech4Green", koji bi bio smješten u objektu „Vidikovac“ Trebević, rezultat saradnje Grada Sarajevo i Verlab Instituta, sa predstavnicima Kantona Sarajevo, Univerziteta u Sarajevu te Delegacije EU u BiH koji su prepoznali značaj i potencijal osnivanja jedne ovakve naučno-istraživačke infrastrukture.

Iz navedenih razloga, Predsjedavajući Gradskog vijeća Grada Sarajeva inicira donošenje predmetne odluke, s ciljem realizacije inicijative za formiranje centra za prikupljanje i obradu podataka, te razvijanje indikatora za praćenje razvoja Grada Sarajeva, u okviru određenog naučno istraživačkog subjekta Grada Sarajeva. Na ovaj način Grad Sarajevo bi stvorio preduslove za ispunjenje ciljeva održivog razvoja u skladu sa standardima UNSDG te istovremeno omogućio dostizanje standarda predviđenih evropskim strateškim dokumentima kao što je EU Green Deal te Digitalna Strategije EU.

Rezultati rada ovakve naučno-istraživačke infrastrukture bi predstavljali osnovu za strateško i sektorsko planiranje Grada Sarajeva, formulaciju projekata, te monitoring i usmjeravanje njihove implementacije, odnosno dosezanja strateških ciljeva Grada Sarajeva i zajednice u cjelini.

Poznato je da je jedna od mjera u okviru prioriteta Sarajevo Smart City ka dostizanju strateškog cilja Grada Sarajeva – "Grad budućnosti i riznica prošlosti", utvrđenih aktuelnom Strategijom razvoja Grada Sarajeva, i razvijanje naučnih i istraživačkih djelatnosti i aktivnosti i, s tim u vezi, saradnja s drugim subjektima.

Tako je osnovni cilj osnivanja Tech4Green prikupljanje i obrada podataka potrebnih za uspostavljanje i realizaciju različitih ciljeva u svim sferama od interesa za zajednicu, ali i onih od interesa za druge subjekte, prvenstveno u Sarajevu, Bosni i Hercegovini i regiji, te za sve koji iskazuju interes za korištenje usluga Tech4Green. Realizacijom projekta stvorili bi se neophodni uslovi za uspostavu moderne naučne-istraživačke i tehničke infrastrukture koja uključuje računar visokih performansi i druge tehnološke alate neophodne za osiguravanje i podsticanje daljnjeg procesa digitalne transformacije, razvoja novih tehnologija i inovacija unutar akademskog i poslovnog sektora u Bosni i Hercegovini. Nakon uspostave i početka rada Tech4Green sve javne institucije, naučna i poslovna zajednica u BiH i drugi zainteresirani subjekti će dobiti pravo i mogućnost da, u skladu sa uvjetima koji će se naknadno propisati odlukama Gradskog vijeća Grada Sarajeva, koriste sve kapacitete Tech4Green u cilju razvoja i unaprjeđenja svog djelovanja i poslovanja, u skladu sa općeprihvaćenim standardima i ciljevima održivog razvoja.

Posebno je važno naglasiti što je već u inicijalnoj fazi ovog projekta izvjesno značajno finansiranje koje je moguće ostvariti iz fondova EU, a što bi nakon početka rada Tech4Green bilo moguće i značajno uvećati kroz rad Tech4Green. Okvirne procjene su da će Tech4Green u prvih nekoliko godina svog djelovanja osigurati ulaganja od najmanje 30 miliona maraka samo u opremu i modernizaciju, bez prihoda koji će se ostvarivati djelovanjem Tech4Green.

Inicijalni sastanak relevantnih subjekata koji mogu doprinijeti razvijanju ove ideje, predsjedavajući Gradskog vijeća i gradonačelnica Grada Sarajeva, su održali sa predstavnicima delegacije EU u BiH, predstavnicima Kantona Sarajevo, Federacije BiH i Verlab Instituta u Sarajevu. Prisutni su se upoznali sa idejom za formiranjem centra nastalom u komunikaciji Grada Sarajeva i "Naučno-istraživačkog instituta Verlab za biomedicinski inženjering, medicinske uređaje i vještačku inteligenciju".

Tada je iskazana snažna podrška ovoj ideji, te opredjeljenje prisutnih da se institucije koje predstavljaju na odgovarajući način uključe u realizaciju Projekta, od kojeg će koristiti imati, zajednički je ocijenjeno, obrazovni, naučni i istraživački sektor, javne institucije i privredna društva iz cijele BiH, te su iskazali spremnost osigurati sve neophodne uslove kako bi se ostvario cilj u razumnom roku.

Opredjeljenje svih učesnika sastanka je bilo i da se dio sredstava ostvarenih radom budućeg naučno-istraživačkog centra, namjenski usmjerava za zaštitu prirode zaštićenog područja Trebević. Tada je inicirana i potreba revizije Plana upravljanja zaštićenim pejzažem Trebević, kako bi se prvobitna namjena objekta Vidikovac na Trebeviću mogla preinačiti, tako da se u objekt može smjestiti i jedna ovakva naučno-istraživačka institucija. Razmatrane su mogućnosti daljnjeg razvijanja Projekta i u saradnji s Federacijom BiH, na temu istraživanja

vještačke inteligencije, a posebno je istaknut značaj podrške EU kroz odgovarajuće instrumente.

Objekt Vidikovac na Trebeviću bi na ovaj način dobio odgovarajuću namjenu, a realizacijom projekta Grad Sarajevo bi dobio najsavremeniju naučnoistraživačku infrastrukturu koja je neophodna za daljnji razvoj akademske i poslovne zajednice ne samo Grada Sarajevo već i cijele Bosne i Hercegovine. Na ovaj način, Grad Sarajevo će potvrditi liderstvo u oblasti razvoja nauke, inovacije i digitalne transformacije u Bosni i Hercegovini te svim građanima Bosne i Hercegovine kao i svim obrazovnim institucijama i privrednim društvima osigurati najmoderniju tehnološku infrastrukturu i tako potvrditi i na taj način da je Sarajevo glavni grad svih građana BiH i da njegova administracija nastoji biti podrška razvoju cijele Bosne i Hercegovine.

PREDLOŽENA RJEŠENJA

U članu 1. se definiše predmet odluke.

Ovom Odlukom Grad Sarajevo pristupa Projektu osnivanja Naučno-istraživačke infrastrukture "Tech4Green".

U Člana 2. se određuju osnovna načela

U članu 3. se iskazuje opredjeljenje Gradskog vijeća da bude osnivač Tech4Green i kojem će se na odgovarajući način ustupi na korištenje i upravljanje objekat Vidikovac na Trebeviću.

U članu 4. se određuje okvir za utvrđivanje osnovnog cilja projekta.

U članu 5. se određuje okvir za osnovne aktivnosti koje je potrebno preduzeti u okviru projekta.

U članu 6. se uređuju obaveze koje je potrebno izvršiti s ciljem osnivanja i stvaranja osnovnih uslova za rad Tech4Green.

U članu 7. se predlaže da se sredstva potrebna za osnivanje i početak razvijanja Projekta obezbijede u budžetu Grada Sarajeva.

U članu 8. se uređuje stupanje na snagu odluke i obaveza objave u „Službenim novinama Kantona Sarajevo“.

FINANSIJSKA SREDSTVA

Sredstva će se obezbijediti u Budžetu Grada Sarajeva iz izvora, a po prijedlogu gradonačelnice.